

**Greenland Airports International A/S-imi piginnissutsit tamakkerlugit
pissarsiarinissaat siunertaralugu, Naalakkersuisut naalagaaffiup oqartussaasuinut
(Rigsmyndighederne) saaffiginninnissaannut peqquneqarnissaannik Inatsisartut
aalajangiiffigisassaattut siunnersuut
(Inatsisartunut ilaasortaq Pele Broberg, Naleraq)**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Erik Jensen, Siumut, siulittaasoq
Inatsisartunut ilaasortaq Pele Broberg, Naleraq, siulittaasup tullia
Inatsisartunut ilaasortaq Jørgen Rosbach, Demokraatit
Inatsisartunut ilaasortaq Margrethe Thaarup Andersen, Demokraatit
Inatsisartunut ilaasortaq Mariane Paviasen, Inuit Ataqatigiit

2025-mi Inatsisartut ukiakkut ataatsimiinneranni ulloq 21. oktober siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Naalagaaffiup Greenland Airports International A/S-imi aktiat pigisaasa tamarmiusut pissarsiarineqarnissaasa qulakkeerneqarnissaanut Naalakkersuisut peqquneqarnissaat siunnersuutiginerqarpoq. Taamaaliornikkut attaveqaasersuutit taakku inuiaqatigiinnut pingaarutillit inuiannit kalaallinit tamakkiisumik pigineqalernissaat siunnersuuteqartup kissaatigaa.

Piginnittuuneq pillugu Kalaallit Airports Holding A/S-ip danskillu naalagaaffiata akunnerminni isumaqatigiissutaat siunnersuuteqartumit innersuussutigineqarpoq, tassani allassimalluni Naalagaaffiup ingerlatseqatigiiffimmi aktiaataasa tamarmiusut pisiarinissaannik Namminersorlutik Oqartussat neqerooruteqassappata Naalagaaffiup Namminersorlutillu Oqartussat isumaqatigiinniarnermik ingerlatsinissaat Naalagaaffimmit piareersimaffigineqartoq.

Siunnersuutip siullermeerneqarnera

Attaveqaasersuutit inuiaqatigiinnut pingaarutillit najukkamit aqunneqarnissaasa sulissutigineqarnissaa Inatsisartunit isumaqataaffigineqarpoq. Taamaassappat Naalackersuisut isumaqarput tamanna aatsaat pissasoq aningaasaqarnikkut inissisimanerup tamanna ajornarunnaarsipagu.

Naalackersuisut ulloq 21. oktober allannguutissatut siunnersuut imaattoq saqqummiuppaat:

”Greenland Airports International A/S-mi naalagaaffiup piginneqataassutaanik ti-gusinermi suleriaaseq suna atorneqassanersoq aamma qanoq akeqassanersoq Naalackersuisut misissussagaat Naalackersuisut Peqquneqarput, misissuinerlu pia-reerpat inatsisartunut ilisimatitsissutit saqqummiunneqassalluni.”

Naalackersuisut allannguutissatut siunnersuut ilaatigut ima tunngavilersorpaat:

”Naalackersuisut soorunami piffissaq ungasinnerusoq eqqarsaatigalugu attaveqaaser-suutitsinnik pingaaruteqarluinnartunik kisimiilluta piginnittuulernissarput anguniagari-vaat. Kisiannili tamanna piffissami aningaasatigut attanneqarsinnaasumi eqqarsaatigil-luakkamillu ingerlasoqalernerani pisariaqarpoq. Taamaattumik Naalackersuisut kissaa-tigaat uuma inatsisartunut aalajangiiffissatut siunnersuutip isikkumisut isikkoqarluni iti-gartinneqarnissaa.”

Inuit Ataqtigiit ulloq 21. oktober allannguutissatut siunnersuut imaattoq saqqummiuppaat:

”Greenland Airport International A/S-ip tamakkiisumik, naalagaaffiup iluani ikin-nerussuteqarluta nunap inoqqaavisut pisinnaatitaaffigut tunngavigalugit, nunatsin-nit pigineqalernissaa siunertaralugu Naalackersuisut naalagaaffiup oqartussaasui-nut (Rigsmyndigheder) saaffiginnissuteqassasut, piumasaralugu nunatta iluani pi-ginnittussaataanerput tunngavigalugu mittarfiit Nuummi Ilulissanilu taakkunun-galu attuumaassuteqartut tamarmik nunatsinniit tamakkiisumik pigineqarnissaa-nik suliaqaqqullugit Inatsisartut aalajangiiffissaattut siunnersuut”

Inuit Ataqtigiit allannguutissatut siunnersuut ilaatigut ima tunngavilersorpaat:

”Naalagaaffiup iluani naalagaaffeqatigiinnermi uagut inuiattut ikinnerussuteqarluta inissisimanitsinni naalagaaffiup pisinnaatitaaffigut naapertorlugit sulinissaminik pisa-saaffeqarnera sakkortusisamik atortariaqarparput, pisinnaatitaaffitta ilagimmassuk nu-natut nammineq uagut aningaasarsiornermi, piginnittuunermiluunniit killilersorneqar-tussaanata.”

Ataatsimiititaliap siunnersuummik suliarinninnera

Greenland Airports A/S-ip kalaallinit kisermaanpeqarluni pigineqarnissaa taamaalillunilu ta-makkiisumik aqunneqarnissaa siunnersuuteqartup siunnersuuteqarnermini kissaatigaa. Siuliani oqaatigineqartut attaveqaasersuutit inuiaqatigiinnut pingaarutillit najukkamit aqunneqarnis-

saasa sulissutigineqarnissaa Inatsisartunit isumaqatigiiffiuvoq. Nunatsinni attaveqaasersuutit-inuiaqatigiinnut pingaarutillit soorunami Kalaallit Nunaannit kisermaallugit pigineqarnissaanik anguniagaq Naalakkersuisunit isumaqatigineqartoq oqaatigineqarpoq, anguniagarli taanna ungasinnerusumi anguneqartussatut isigineqarluni.

Naalakkersuisut isumaqarput Nunatta Karsiata inissisimanerata pisariaqartikkaa aningaasaliinissat annertunerusut sukumiisumik pingaarnersiorneqarnissaat aammalu maanna pisariaqartitanik nukinginnartunik allanik peqartoq immikkut eqqumaffigineqarlutillu nukinnik atuiffiusariaqartunik. Naalakkersuisut isumaqarput tamakkiisumik tigusinissaq aningaasaqarnikkut maanna illersorneqarsinnaanngitsoq.

Nuummi Ilulissanilu mittarfiliornertut danskit akuunissaat Naalakkersuisut danskillu naalakkersuisuisa 2018-ip ukiaani isumaqatigiissusiorfigaat. Tamanna aqqutigalugu aningaasaliissuteqaqqittoqarpoq kiisalu ingerlatseqatigiiffik taarsigassarseqqinnissamut periarfissaqalerluni. Ilaatigut danskit naalagaaffiat Greenland Airports International A/S-imut aningaasaliinerit 1/3-iat aningaasaliissutigaat, tamatumani ingerlatseqatigiiffik Namminersorlutik Oqartussanit pigineqartoq Greenland Airports A/S 2/3-iannik aningaasaliissuteqarluni, taamaalillunilu kingullertut taaneqartoq ingerlatseqatigiiffimmut annertuumik aqutsisuulluni. Aktiaatillit akornanni pissaanermut tunngasut ingerlatseqatigiiffiit pillugit inatsimmi malittarisassiuunneqarput.

Pissaanerulli aqqissuussaanaera ingerlatseqatigiiffiup ileqqoreqqusaatigut aamma/imaluunniit aktiaatillit isumaqatigiissutaatigut sunnerneqarsinnaavoq. Kikkut aalajangiisinnaassuseqarnerisut ileqqoreqqusakkut aalajangersarneqarpoq, aktiaatillillu isumaqatigiissutaatigut aalajangersarneqarluni oqartussaaffik taanna qanoq qanorlu atugassaqartitsilluni atorneqassanersoq. Aktiaatillit isumaqatigiissutaatigut (piginnittut isumaqatigiissutaat) isumaqatigiissuteqartut isumaqatigiissummik atsiornermikkut pituttorneqartarput, ingerlatseqatigiiffimmi pissaanermik atui-nermut aalajangiisuusumik sunniuteqarsinnaasumik.

Ingerlatseqatigiiffik kalaallinit tamakkiisumik aqunneqalissagaluarpat tamanna ingerlatseqatigiiffiup ileqqoreqqusaata aamma/imaluunniit aktiaatillit isumaqatigiissutaata imarisaanut qanoq sunniuteqassanersoq siullermeerinninnerup nalaani nassuiaatigineqanngilaq. Kalaallit Nunaat tamakkiisumik tigusippat aktiaatilinnut allanut pituttorsimasoqarunnaassasoq ataatsimii-titaliap akuersaarpa. Kalaallit attaveqaasersuummik inuiaqatigiinnut pingaarutilimmik taassuminnga kisimik piginnittuulernissaat tamakkiisumik tigusinermi qulakkeerneqassaaq.

Tigusineq piffissami aningaasaqarnikkut illersorsinnaaffiusumi aammalu aqqissuussaannikkut isumaliutigilluagaasumik pisariaqartoq Naalakkersuisut oqariartuutigaat. Taamatut oqariartuuteqarneq siunnersuutip siullermeerneqarneranut atatillugu erseqqinnerusumik itisiliinermik ilaqartinneqarsimasariaqaraluartoq ataatsimiiititaliaq isumaqarpoq.

Ingerlatseqatigiiffiup taaneqartup tamakkiisumik tiguneqarnissaa siunertaralugu naalagaaffiup oqartussaasuinut attaveqaqqullugit Naalakkersuisunut peqqusinermik aallarnerneqartumik sulissutiginnittoqarnissaanut pisortatigoortumik akimmiffissaqanngitsoq ataatsimiiititaliaq isumaqarpoq.

Tamanna tunngavigalugu allannguutissatut siunnersuut kingulianiittoq ataatsimiititaliamit saq-qummiunneqarpoq:

” Greenland Airports International A/S-imi piginnittuunerup tamakkiisumik tiginissaa siunertaralugu Naalagaaffiup oqartussaasunut attaveqaqqullugit Naalakkersuisut peq-quneqarnissaannik Inatsisartut aalajangiiffigisassaattut siunnersuut, taamaaliornikkut nunap inoqqaavisa piginnaatitaaffii isumaqatigiissutitigut aalajangersarneqartut taak-kunanilu siunertarineqartut naapertorlugit inuiaat kalaallit namminneq aningaasaqar-nerminnik inuiaqatigiittullu ineriartornerminnik sapinngisamik annertunerpaamik nak-kutilliinissamut periarfissaannik siuarsaasoqarsinnaaqqullugu nukittorsaasoqarsinnaaq-qullugulu. Naalakkersuisut Naalagaaffimmi oqartussaasunut kingusinnerpaamik ulloq 1. januar 2027-mi saaffiginnissapput.”

Siunnersuut akuerineqassappat suliap ingerlanneqarnera pillugu Inatsisartut Naalakkersuisunit ingerlaavartumik ilisimatinneqartarnissaat ataatsimiititaliamit kissaatigineqarpoq.

Siunnersuutip aningaasaqarnikkut kingunerisassai

Naalagaaffiup piginneqataassutaasa tiginerat suliami matumani aningaasaqarnikkut toqqaan-nartumik aamma/imaluunniit toqqaannangitsumik qanorpiaq kinguneqarsinnaanera oqaatigi-neqarsimannigilaq.

Ingerlateqatigiiffiit pillugit inatsisit eqqarsaatigalugit naalagaaffiup Greenland Airports - Mit-tarfeqarfiit A/S-imi piginneqataassutaanik tigusisoqassappat tamanna naalagaaffiup Nammi-nersorlutillu Oqartussat akornanni toqqaannartumik pinnani naalagaaffiup aammalu Greenland Airports A/S-ip akornanni aallaaviatigut isumannaarneqassaaq. Imaangilarli tigusineq Nunat-ta Karsianut aningaasaqarnikkut kinguneqassasoq. Tassunga atatillugu Greenland Airports A/S-imi, Namminersorlutik Oqartussanit pigineqartumi, piginnittuuneq Naalakkersuisunit isu-magineqassaaq.

Naalakkersuisut aalajangiiffigisassatut siunnersuummut akissuteqaamminni kinguliani allassi-masut erseqqissaatigaat:

“Greenland Airports, Mittarfeqarfiit A/S-p aamma Danmarkip naalagaaffiata piginnittuuner-mut isumaqatigiissutaat aalajangersakkamik imaqarpoq, (§13.5), tassani periarfissamik am-maasoqarluni Naalakkersuisut tatiginnillutik naalagaaffiup aktietaasa pissarsiarineqarnissa-nut neqerooruteqarsinnaallutik. Naalakkersuisut periarfissaq tamanna ilisimaaraat, akuer-saarlugulu siunissami isumaqatigiinniartoqassappat taamatut aalajangersagaqarmat.”

Siuliani issuarneqartup imarisaanik ataatsimiititaliap paasinninnera malillugu Namminersor-lutik Oqartussat Greenland Airports A/S sinnerlugu piviusorsiorlumik pimoorussamillu pisi-nissamut neqerooruteqartariaqarput. Tamatuma kingorna immaqa isumaqatigiinniartoqareer-natigut neqeroorut taamaattoq akuerineqarsinnaanersoq danskit naalagaaffiata aalajangigassa-

raa. Naalagaaffiup aktiaataanik tigusinermut atatillugu Nunatta Karsianit akilerneqartussanik aningaasartuuteqartoqassappat aningaasaliissuteqarnissap siumoortumik akuersissutigineqareersimanissaa pisariaqassaaq.

Ataatsimiititaliap siunnersuuteqartup siunertarisaanik paasinninnera malillugu siunnersuutip aningaasaqarnikkut annertoorujussuarmik kinguneqarnissaa siunnersuuteqartumit naatsorsutigineqanngilaq. Siunnersuuteqartoq ataatsimiititaliamit ima paasineqarpoq Naalakkersuisut naalagaaffimmilu oqartussat akornanni isumaqatigiissusiornissamut periarfissaqassasoq, tamatumani tigusineq Namminersorlutik Oqartussanut aningaasartuutaanngitsumik imaluunniit anner-tunerusumik aningaasartuuteqarfiunngitsumik pisinnaassalluni. Ataatsimiititaliamilli eqqumaf-figineqarpoq isumaqatigiissusiornermut atatillugu Namminersorlutik Oqartussat allanik, soorlu isumaqatiginninniarnernut siunnersortillu aningasarsiaannut, aningaasartuuteqarsinnaammata.

Ataatsimiititaliap inassuteqaatai

- Ataatsimiititaliap isumaqatigiittup Naalakkersuisut allannguutissatut siunnersuutaata itigartinneqarnissaa inassutigaa.
- Ataatsimiititaliap isumaqatigiittup Inuit Ataqaatigiit allannguutissatut siunnersuutaata itigartinneqarnissaa inassutigaa.
- Ataatsimiititaliap isumaqatigiittup nammineq allannguutissatut siunnersuutimi akuerineqarnissaa inassutigaa.
- Ataatsimiititaliap isumaqatigiittup aalajangiiffigisassatut siunnersuutip itigartinneqarnissaa inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap si-
unnersuut aappassaaniigassanngortippaa.

Erik Jensen
Siulittaasoq

Pele Broberg
Siulittaasup tullia

Jørgen Rosbach

Margrethe Thårup Andersen

Mariane Paviasen Jensen